

Pengurusan Konflik Politik Ber

Moht Shukri Hanapi


Pensyarah Kanan di Pusat Kajian
Pengurusan Pembangunan Islam (ISDEV),
Universiti Sains Malaysia

Konflik ialah suatu pertentangan dan perselisihan yang terjadi antara dua pihak, iaitu ketika kedua-duanya menginginkan keperluan yang sama. Hal ini ditambah pula dengan adanya hambatan daripada kedua-dua pihak. Lawan kepada konflik ini ialah integrasi. Melalui integrasi, masyarakat dapat disatukan dan menjadi lebih baik atau harmonis. Integrasi juga difahami sebagai kata sepakat yang sudah dicapai, atau sudah dekat untuk dicapai.

Konflik integrasi

Dalam politik, konflik dan integrasi merupakan dua hal yang tidak dapat dipisahkan. Konflik mempunyai hubungan yang erat dengan proses integrasi. Setiap konflik yang terjadi akan disusuli dengan usaha pengintegrasian atau perdamaian seperti bertindak menahan penggunaan kekerasan yang boleh menumpahkan darah, iaitu menggantikan konflik dengan suatu bentuk integrasi.

Buktinya dapat dianalisis konflik politik yang terjadi tentang *imamah* (kepimpinan) selepas kewafatan Rasulullah SAW, terutama antara golongan muhajirin dengan Ansar. Walau bagaimanapun, konflik politik



ini dapat diurus dengan baik sehingga kedua-dua pihak bersetuju melantik Abu Bakar al-Siddiq sebagai khalifah Islam yang pertama. Dengan hal demikian, keadaan kembali tenang dan tiada sebarang pertumpahan darah berlaku.

Sesuatu konflik politik yang gagal diurus dengan baik akan mengundang konflik yang berpanjangan, malah boleh membawa kepada peperangan. Semua ini akan memberikan kesan buruk terhadap kehidupan. Hal ini dapat dibuktikan dengan konflik politik yang terjadi antara kelompok Ali bin Abu Talib dengan Muawiyah bin Abu Sufyan. Puncanya apabila kelompok Muawiyah

bin Abu Sufyan menuntut Ali bin Abu Talib dilantik menjadi khalifah supaya mengambil tindakan terhadap kumpulan pemberontak yang terlibat dalam kes pembunuhan Uthman bin Affan.

Pertentangan antara kelompok Muawiyah bin Abu Sufyan dengan Ali bin Abi Talib semakin meruncing dan membawa kepada berlakunya peperangan Siffin pada tahun 37H. Meskipun terdapat usaha untuk mencari jalan penyelesaian terhadap konflik yang berlaku, seperti mengadakan Majlis Tahkim (berunding) di Da'umah al-Jandal pada bulan Ramadan tahun 37H, namun masih gagal mewujudkan pengintegrasian antara kedua-

dua belah pihak. Pergolakan dan perpecahan terus berlaku.

Pengurusan konflik politik

Sehubungan dengan itu, tidak kira sama ada konflik yang berlaku itu kecil atau besar, hal tersebut perlu diurus melalui kaedah yang baik bagi menjamin keutuhan, kestabilan, keamanan dan kemakmuran negara sentiasa terpelihara. Dalam Islam, kaedah pengurusan konflik politik berteraskan Islam paling tidak perlu mempunyai enam elemen utama.

Pertama, wajib berpandukan al-Quran dan sunah. Sesuatu konflik yang berlaku bukanlah disebabkan masalah politik semata-mata, tetapi juga kerana tidak berpandukan al-Quran dan sunah. Sebagai contoh, terdapat kekurangan pada aspek kejujuran dalam Majlis Tahkim antara Amru bin al-'As yang mewakili Muawiyah bin Abu Sufyan dengan Abu Musa al-Asy'ari yang mewakili kelompok Ali bin Abi Talib. Kedua-duanya bertindak sebagai hakim daripada kelompok masing-masing. Mengikut sesetengah riwayat, Amru bin al-'As telah melakukan tipu helah terhadap Abu Musa al-Asy'ari dengan mengatakan konflik yang terjadi disebabkan oleh Ali bin Abi Talib dan Muawiyah bin Abu Sufyan.

Bagi mewujudkan perdamaian, Amru bin al-'As memutuskan kedua-dua mereka patut diketepikan dan kemudian diserahkan kepada umat Islam untuk memilih khalifah yang baharu. Tipu helah

yang dilakukan oleh Amru bin al-'As itu telah berjaya menarik perhatian Abu Musa al-Asy'ari. Dalam hal ini, Amru bin al-'As memberikan peluang kepada Abu Musa al-Asy'ari untuk menaiki mimbar dan mengumumkan pemecatan Ali bin Abi Talib. Selepas itu, Amru bin al-'As pula menaiki mimbar dan mengumumkan penerimaan pemecatan Ali bin Abi Talib.

Oleh sebab Ali bin Abi Talib telah dipecat daripada jawatan khalifah, maka tinggal seorang sahaja lagi, iaitu Muawiyah bin Abu Sufyan. Oleh itu, Amru bin al-'As menetapkan Muawiyah sebagai khalifah umat Islam seluruhnya. Penetapan ini menyebabkan kelompok Ali bin Abi Talib tidak berpuas hati.

Jelas di sini bahawa faktor utama terjadinya konflik dalam kalangan umat Islam hari ini adalah berpunca daripada berpolitik dengan tidak berpandukan al-Quran dan sunah. Ada kelompok yang bertindak menghina dan mengaibkan kelompok lain di mimbar dan ceramah, bahkan ada yang dengan mudah mengkafirkan sesama Muslim. Jika konflik politik ini dibiarkan terus berlaku tanpa dikelolakan secara Islam, maka hal tersebut bagaikan mengulangi sejarah silam konflik umat Islam.

Kedua, menggunakan kebijaksanaan dengan

bertujuan mengkejarkan ummah, terutama masyarakat yang baru memeluk dan memahami agama Islam. Pada masa yang sama, seseorang pengurus wajib mengurus konflik hanya kerana Allah SWT. Ketika terjadinya peperangan Siffin, empayar pemerintahan Islam sangat luas. Hal ini ditambah pula dengan ramai orang yang baru memeluk Islam, tetapi belum memahami ajaran Islam sepenuhnya. Dalam situasi sedemikian, dengan ketiadaan pemimpin yang bijaksana

Apabila berlakunya perbezaan pandangan dan perpecahan umat, maka perlu ada golongan yang tampil membina jalan ke arah kesatuan antara pihak yang bertelagah.

seperti Rasulullah SAW dan para sahabat Baginda seperti Abu Bakar al-Siddiq, Umar bin al-Khattab dan 'Uthman bin 'Affan, serta para sahabat besar Rasulullah

SAW yang lain, maka kesatuan ummah mudah tergugat.


Kelemahan ini memberikan peluang kepada musuh Islam seperti Yahudi dan Nasrani yang mempunyai agenda kepentingan peribadi atau agenda untuk memecah-belahkan ummah memanipulasikan pelbagai isu kecil dan remeh sehingga boleh menjadi isu besar. Dalam keadaan begini, pemimpin yang ikhlas dan bijaksana sangat diperlukan kerana mereka tidak mudah terikut-ikut dengan "tarian" musuh. Malah, mereka tidak mempunyai tujuan

lain, melainkan hanya untuk mendapat keredahan Allah SWT.

Ketiga, hendaklah sentiasa berwaspada dengan musuh, terutamanya pihak yang secara zahirnya nampak sebagai Muslim, tetapi secara batinnya memusuhi Islam (munafik). Musuh dalam selimut sebegini boleh merosakkan Islam dari dalam seumpama api dalam sekam. Barisan kepimpinan Ali bin Abi Talib dan Muawiyah bin Abu Sufyan yang lemah memudahkan musuh dalam selimut memainkan peranannya untuk memecah-belahkan umat Islam dari dalam.

Dalam perang Siffin, terdapat golongan munafik yang berada dalam kumpulan Ali bin Abi Talib. Mereka berusaha meletakkan pemimpin mereka berdampingan dengan Ali bin Abi Talib dan membuat keputusan demi keputusan yang sentiasa berlawanan dengan keputusan Ali bin Abi Talib dan para sahabat Rasulullah SAW yang lain.

Mereka mempunyai kemahiran memanipulasikan keadaan serta pandangan Ali bin Abi Talib dan orang kepercayaannya. Mereka dapat mengenal pasti kelemahan Ali bin Abi Talib dan memanipulasikan kelemahan itu. Contohnya, mereka membantah keputusan Ali bin Abi Talib untuk menghantar pesanan secara rahsia kepada Ibn Abbas dalam Majlis Tahkim. Mereka mahu setiap pesanan perlu didedahkan kepada semua pengikut setia Ali bin Abi Talib. Selain itu, mereka juga membantah pelantikan Ibn Abbas sebagai wakil Ali bin Abi Talib ke Majlis Tahkim,



Allah SWT menyeru umat Islam agar berusaha mendamaikan dua golongan yang saling bertelagah dan fitnah-memfitnah, seterusnya berusaha menyekat daripada berlakunya peperangan yang boleh mengorbankan nyawa dan merosakkan harta benda.

dan mendesak supaya Abu Musa al-Asy'ari dilantik sebagai wakilnya.

Terdapat juga riwayat yang menyatakan bahawa pada mulanya Ali bin Abi Talib ke Syam untuk bertemu dan berbincang dengan Muawiyah bin Abu Sufyan. Bagi menggagalkan pertemuan dan perbincangan yang dirancang itu, kelompok munafik yang berada dalam kumpulan Ali bin Abi Talib telah memulakan serangan terhadap tentera

Muawiyah bin Abu Sufyan di Siffin tanpa arahan daripada Ali bin Abi Talib.

Hal yang sama terjadi dalam kelompok Muawiyah bin Abu Sufyan. Golongan munafik mula memainkan peranan mereka tatkala berlakunya perang Siffin. Amru bin al-'As mencadangkan Muawiyah bin Abu Sufyan menghentikan peperangan dan kembali kepada al-Quran dan sunah, iaitu mengadakan perbincangan bagi tujuan perdamaian. Namun begitu, golongan munafik memanipulasikan isu tersebut sehinggakan ramai umat Islam terpedaya dan telah meletakkan al-Quran di hujung pedang dan tombak serta melaung-laungkan supaya peperangan dihentikan. Perbuatan tersebut dilihat sebagai menghina al-Quran dan bukanlah arahan daripada Muawiyah bin Abu Sufyan.

Jelas di sini bahawa dalam mengurus konflik, seseorang itu perlu berwaspada dengan "musuh dalam selimut". Mereka mempunyai agenda tertentu dan berusaha untuk menggagalkan usaha menyatupadukan ummah.

Keempat, beristiqamah membina perpaduan. Sebenarnya, sikap mengecualikan diri daripada menghadapi konflik yang berlaku dan tidak berusaha membina perpaduan merupakan suatu perbuatan yang tidak memberikan manfaat kepada umat Islam, malah memberikan peluang kepada musuh Islam untuk menghancurkan perpaduan yang dibina. Dalam hal ini, seseorang pengurus konflik patut meneladani usaha yang

dilakukan oleh Abu Umamah al-Bahili, Abu Darda' dan para sahabat Rasulullah SAW yang lain dalam menyelesaikan konflik yang berlaku. Apabila berlakunya perpecahan pandangan dan perpecahan umat, maka perlu ada golongan yang tampil membina jalan ke arah kesatuan antara pihak yang bertelagah.

Perkara ini ada dijelaskan dalam firman Allah SWT yang bermaksud, "Dan jika dua puak daripada orang beriman berperang, maka damaikanlah antara kedua-duanya. Jika satu pihak daripadanya melakukan kezaliman terhadap yang lain, maka perangilah puak yang zalim itu sehingga mereka kembali mematuhi perintah Allah; jika mereka kembali patuh, maka damaikanlah antara kedua-duanya dengan adil (menurut hukum Allah) serta berlaku adillah kamu (dalam segala perkara); sesungguhnya Allah mengasihi orang yang bertindak adil. Sebenarnya semua orang yang beriman itu bersaudara, maka damaikanlah antara dua saudara kamu (yang berpecah) itu, dan bertakwalah kepada Allah supaya kamu beroleh rahmat." (*Surah al-Hujurat* 49:9-10).

Dalam ayat ini, Allah SWT menyeru umat Islam agar berusaha mendamaikan dua golongan yang saling bertelagah dan fitnah-memfitnah, seterusnya berusaha menyekat daripada berlakunya peperangan yang boleh mengorbankan nyawa dan merosakkan harta benda. Seseorang Muslim yang berperanan sebagai pengurus tidak seharusnya

berdiri sebagai penonton dan membiarkan perpecahan bertambah buruk dan semakin parah. Setiap orang yang berkebolehan dan berkemahiran patut membabitkan diri sebagai pengurus konflik untuk mengekang perpecahan daripada terus merebak.

Kelima, mengetepikan penglibatan pihak luar. Dalam hal mengurus sesuatu konflik yang berlaku antara dua kelompok dalam kalangan umat Islam, elakkan daripada membenarkan campur tangan pihak luar yang pada zahirnya nampak seperti ingin membantu, tetapi pada hakikatnya ingin memecah-belahkan umat Islam. Ada riwayat yang menyatakan bahawa kerajaan Rom telah menghantar utusan bertemu dengan Muawiyah bin Abu Sufyan dan menawarkan pertolongan untuk memerangi tentera Ali bin Abi Talib. Dengan ketegasan Muawiyah bin Abu Sufyan, beliau menolak campur tangan kuasa asing itu kerana beliau sendiri tahu yang beliau bukan menentang kepemimpinan Ali bin Abi Talib sebagai khalifah Islam, tetapi hanya menuntut supaya pembunuh Uthman bin Affan diadili dan dihukum terlebih dahulu.

Keenam, menyelidiki segala maklumat. Dalam situasi tegang dengan perbalahan dan perpecahan, maklumat yang benar, sahih dan tepat sukar diterima dan dihayati oleh kedua-dua belah pihak yang bertelagah. Matlamat dan hala tuju perjuangan akan menjadi kabur; dan sesuatu isu mudah dimanipulasikan

dengan golongan emosi. Apabila santonan munafik yang bergerak secara berstrategi berjaya menguasai penyebaran maklumat dalam masyarakat, maka kebanyakan orang akan terkeliru dan terpengaruh.

Contohnya, dalam periwayatan perang Siffin, kelompok Muawiyah bin Abu Sufyan dikatakan sebagai pemberontak yang menentang Ali bin Abi Talib berdasarkan hadis Rasulullah SAW yang menyatakan bahawa Ammar bin Yasir akan dibunuh oleh pemberontak, dan Ammar pada waktu itu berada dalam kelompok Ali bin Abi Talib dan syahid. Mereka terlupa dengan hadis lain yang menyatakan bahawa pembunuh Zubair bin Awwam akan mendapat balasan di neraka, sedangkan ketika itu Zubair berada dalam kelompok Muawiyah bin Abu Sufyan dan juga syahid. Para sahabat Rasulullah SAW yang berada dalam kedua-dua kelompok itu menjadi keliru dengan dasar perjuangan mereka.

Kesimpulannya, mengurus manusia amatlah rumit, lebih-lebih lagi mengurus konflik dalam kalangan mereka. Oleh itu, bagi mengembalikan kesatuan umat Islam di negara ini, pengajaran daripada kisah konflik politik yang terjadi antara Ali bin Abu Talib dengan Muawiyah bin Abu Sufyan pascapemerintahan Khalifah Uthman bin Affan patut diambil pengajaran agar konflik seumpama ini tidak berulang lagi. Setiap pengajaran yang diperoleh itulah dijadikan sebagai kaedah pengurusan konflik berteraskan Islam yang merangkumi aspek fizikal dan spiritual. 🕌